

# Prea God i save harim.

---

Moning.

Sapos mi tok, "Planti taim tumas yumi kisim selfis tingting na yumi prea long God," orait bai yu kros long dispela tok o bai yu wanbel? Yu gat wanem tingting?

Taim ol frens bilong Pita na Jon ol i prea, orait ol i no tingim ol samting bilong ol yet na ol i prea, ol i no kisim selfis tingting na ol i prea. Nogat. Ol i tingim ol samting bilong Jisas, na ol i laik ol samting bilong Jisas i kamap strong, na ol i laik ol manmeri i save long trupela rot God i makim bilong kisim bek sinmanmeri.

Ol i no askim God long wokim ol mirakel bai ol yet i kisim biknem. Nogat. Ol i no askim God long wokim mirakel bai ol i ken i yusim bilong kisim kago. Nogat. Ol i no askim God long wokim mirakel bikos ol i laik lukim mirakel tasol. Nogat. *Trutru* ol i laik Jisas i kisim biknem. *Trutru* ol i laik ol manmeri ol i save olsem, Jisas tasol Em i rot God i makim bilong kisim bek sinmanmeri.

Yumi skelim **Aposel 4:23-31** na yumi kisim sampela save long prea God i save harim....

**<sup>23</sup> Orait, ol i lusim tupela pinis na tupela i go long ol frens bilong ol. Na tupela i tokim ol long olgeta toktok ol hetpris na ol bikman i bin mekim long tupela. <sup>24</sup> Na taim ol i harim pinis, ol i wanbel na ol i beten wantaim long God olsem, "BIKPELA Bilong Bosim Olgeta Samting, Yu bin wokim skai na graun na solwara na olgeta samting i stap long en. <sup>25</sup> Long rot bilong Holi Spirit, long maus bilong Devit, papa bilong mipela na wokman bilong Yu, Yu bin tok,**

***"Long wanem as ol Jentail manmeri i belhat nogut tru? Long wanem as ol i bung bilong kamapim plen i no gat strong? <sup>26</sup> Ol king bilong dispela graun ol i sanap redi, na ol hetman i bung wantaim, na ol i egensim BIKPELA na egensim dispela Man BIKPELA i bin makim."* (Buk Song 2:1-2)**

**<sup>27</sup> I tru tumas, Herot na Pontius Pailat wantaim ol Jentail manmeri na ol manmeri bilong ol Israel, ol i bin bung wantaim, long dispela siti, na ol i egensim Jisas, holi wokman bilong Yu na dispela Man Yu bin makim. <sup>28</sup> Na ol i mekim olgeta samting Yu bin makim na plenim i mas kamap. <sup>29</sup> BIKPELA, tingting nau long tok ol i bin mekim bilong pretim mipela, na Yu strongim mipela wokman bilong Yu, bai mipela i no pret na mipela autim tok bilong Yu i go yet. <sup>30</sup> Putim han bilong Yu long ol sikman na oraitim ol na wokim kainkain sain na mirakel long nem bilong Jisas, holi wokman bilong Yu." <sup>31</sup> Na ol i beten pinis na haus ol i bung long en i guria, na Holi Spirit i pulap long ol, na ol i no pret na ol i autim tok bilong God i go yet.**

Ol hetpris lain ol i bin arestim Pita na Jon na ol i tretim tupela, na bihain ol i lusim tupela. Pita na Jon i go long haus bilong ol frens, na tupela i tokim ol long olgeta pret toktok ol hetpris i mekim. Na taim ol hetpris i tretim Pita na Jon, orait ol i tretim olgeta aposel wantaim ol femili na frens bilong ol. Long wanem, ol i save tretim olgeta manmeri i bihainim Jisas na i tokaut long Jisas i kirap bek long matmat na i stap laip. Na taim ol frens i harim tok bilong Pita na Jon, orait ol i mekim wanem? *Ol i prea long God.*

Yumi skelim 2-pela samting long prea bilong ol....

**1. Pastaim ol i pulimapim bel na tingting bilong ol long ol trupela tok bilong God, na dispela trupela tok bilong God i rausim pret bilong ol na i helpim ol i stap isi, na ol i trastim God na trastim plen bilong God.**

God Em i wokim *olgeta samting* na Em i bosim na kontrolim *olgeta samting*. Em olsem na God Em i bosim na kontrolim ol hetpris lain tu, na long dispela as ol hetpris lain ol i no inap winim God na kapsaitim ol samting God i laik mekim long plen bilong Em.

Long bipo tru Holi Spirit, long maus bilong king Devit, Em i tokaut long ol dispela samting, na yumi ken i lukim long **Buk Song 2**. Na Luk (man i raitim buk Aposel) em i kisim dispela tok na em i putim i stap long **lain 25-26**. Buk Song 2 i tokaut long ol Jentail manmeri na ol king na ol hetman na ol i bung wantaim bilong egensim BIKPELA. Long **lain 27** Luk em i makim Pontius Pailat (em man Jentail) na Herot (em king) na ol hetman (ol hetpris bilong lotu Juda), na *wantaim* ol i bung na pasim tok bilong kilim Jisas i dai. Luk i makim Jisas Em i “dispela Man BIKPELA i bin makim”.

Ol dispela man ol i pas wantaim na ol i pasim tok bilong kilim Jisas i dai, na ol i tingim olsem ol i bihainim plen bilong ol yet bilong rausim Jisas na pinisim Jisas. Tasol God i yusim dispela tingting nogut na dispela pasin nogut bilong ol bilong kamapim plen bilong Em yet. Ol i kilim Jisas i dai, tasol dispela i kamap tasol long plen bilong God. God i bosim na kontrolim olgeta samting.

Na long **Buk Song 2:4** Holi Spirit i tok olsem, “*God i sindaun long heven na Em i lap long ol; Em i lap nogut tru long ol.*” Na long wanem as God i lap long ol? God yet i bosim na kontrolim ol na ol i fulfilim plen bilong God tasol, tasol ol i no save. Ol i tingim olsem ol i rausim Jisas. Tasol nogat. Ol i fulfilim plen bilong God. Olsem na God Em i lap nogut tru long ol.

Em olsem na, Pita na Jon na ol frems bilong ol, ol i pulimapim bel na tingting bilong ol long *ol dispela trupela tok bilong bosim na kontrolim bilong God*, na dispela tok i rausim pret bilong ol na i helpim ol i stap isi, na ol i trastim God na trastim plen bilong God.

## **2. Ol i askim God long ol manmeri ol i ken i luksave na klia olsem, Jisas Em i holi wokman bilong God na trutru Em i kirap pinis na i stap laip na Em i rot God i makim bilong kisim bek sinmanmeri.**

Ol i askim God long givim strong long ol na ol i no ken i pret long tretim bilong ol hetpris lain na ol i autim strong tok bilong God i go yet.

Na ol i askim God long wokim ol mirakel moa long nem (namba) bilong Jisas *bai* ol manmeri ol i ken i save olsem, trutru Jisas i kirap bek pinis na Em i stap laip na Em i King bilong olgeta king. Ol i askim God long wokim ol mirakel moa long nem (namba) bilong Jisas *bai* ol manmeri ol i ken i save olsem, Jisas em i rot God i makim bilong kisim bek ol kainkain sinmanmeri. Ol i askim God long wokim ol mirakel moa long nem (namba) bilong Jisas *bai* ol manmeri ol i ken i save olsem, tru tumas i no gat narapela nem i stap na bai God i fogivim sin bilong yumi na kisim bek yumi sinmanmeri.

**Orait na yumi lukim lain 31.** Taim ol i mekim prea bilong ol olsem, orait Holi Spirit i kam long ol na haus bilong ol i gurua. Na *ol i no pret moa na ol i autim strong tok bilong faithful wok bilong Jisas na kirap bek bilong Em i go yet.* Yu save, God i *harim* prea bilong ol na Em i givim samting ol i bin askim Em long en.

**Ol brata na sista,** taim yumi prea, orait yumi mas kisim gutpela tingting na yumi askim God, olsem Pita na Jon na ol frems bilong tupela i mekim. Em olsem na yumi pulimapim tingting bilong yumi long olgeta trupela tok bilong God na yumi prea. Jisas wanpela Em i rot, na ol narapela samting olsem baptais na Sabat na lotu pasin na stretpela pasin i no rot. Planti manmeri i kros long harim dispela kain tok, tasol yumi askim God long strongim yumi long bihainim na long autim dispela tok i go yet, *bai* ol planti manmeri ol i ken i tanim bel na trastim Jisas tasol, na God i fogivim sin bilong ol na kisim bek ol long faithful wok bilong Jisas tasol.

Glenn.

Sapos yu laik save moa long dispela tok, orait yu lukim Aposel 4:23-31 long *Autim Tok* long [www.pngbibleresources.org](http://www.pngbibleresources.org).